

1JN -

1 Zwan

Təntən sagı tə,

Zwan

nə púpúní

Zwan təntən sagı tə yuu wa sugu

Lìù tə, v nə púpúní sagı ku tə

Llà zənzən buŋa də, ku yí *tuntunu Zwan nə púpúní ku. Mə v mù Zwan təntə tətə nə púpúní Zwezi-*Kərisə suywánú tə.

Llà tə nə, Zwan nə púpúní

Zwan púpúní sagı ku tə v pa *Kərisə là púlá tə nə, ba nə gugurə tə də kunkun kàrà.

Sagı tə wa sugu

Yìèn yà zua *Kərisə là púlá tə wa. Kərisə là púlí tə wa là duən yà gıgarı Kərisə là duən ba dıga. Ba yà kàrì kunkun kàrà Zwezi yuu wa, də nətu liù nə mɛ, sə v ya Kərisə liù yuu wa.

Zwan pìà v bırı ba də, Zwezi-Kərisə yí ləzwənə cígá cígá. U yí Yu tə, v nə wulə mu wa, bìú. Yu yí poni, Yu yí sonu. Nə twá də Zwezi də Yu-*Sınu tə nə, nə ma yèə ku nətu tə. U mù nə sını nə cuna tə mama v lı. Cígá cígá Kərisə liù yí liù tə, v nə twá kàrà tə nə, ba nə bırı wá ku jıju mama, ndə ku nə mɛ nətu. Zwezi-Kərisə tì v mu, v ma lárí là tə duən yuu nə. Ku nətu dān bırı də, v swə Yu v ga yèə Yu də. Cígá cígá Kərisə liù də dān mɛ, sə v tì v mu tə, v ma lárí v duən Kərisə là tə yuu nə.

1

Zwezi yi mu sugu

(Zwan 1.1-14, 1 Zwan 5.11-13)

¹ Nə cugu liù kori. Nə nı wá də nə yía. Nə balu wá zəni. Nə dwen u yura də nə jìàn. U mù nə yi liù tə, u nə yin lá, ku jju mama. Ku liù təntə nə yi sugu tə, ku pin mu là nə. ² Liù tə, u nə yi mu, biri u tian nəba. Yá nə mù nı wá. Mə u yoo nə nə dān swin, nə biri aba. Nə swin u mù liù təntə yoo á con. U mù nə yi mu tə, ku nə ba zwè Yu con. U mù yà nə yin də nə nyina Yu tə. U mù liù tə u nə biri u tian nəba, ³ nə nı wá, nə ga nì u kori. U mù yoo nə, nə swin á də con, sə á də ja nimarv də nəba. Nə də con nə, nə də ja *nimaru də nyina Yu, u də u biú Zwezi-*Kərisə. ⁴ Tə yìèn tə yi, nə púpúní tə á nə, sə ku pa nə pupwən tə sú.

Á yana poni là

(Efəzə tián 5.8-14, Titə 2.14)

⁵ Á nəḡə sugu tə, nə nə nì u con, yá nə dān ga pià nə swin ku nə biri aba. Sugv təntə nə yi: Yu yi poni Yu. Yá yikunu tələ u con. ⁶ Nə nə swin də, nə jə *nimaru də Yu, yá nə ga tuḡa yikunu wa yìèn, nə yi kunkuna, nə ga ba cígá tə nii nə twá. ⁷ Yu yi poni Yu. Yá nə nə yi poni là ndə u nə, nə wá ja nimarv duən pwérə wa. Yá Yu biú Zwezi jana tə, tə nə nan u tian tə mánǵa wa, dān wá sin nə cuna tə mama, tə li.

⁸ Nə nə swin də, nə ba cuna tuḡa, nə yi nə gıgarı nə tian, cígá ga tələ də nəba. ⁹ Nə nə swin nə biri də, nə fwa cuna, Yu wá sè u kwen tə cuna tə, nə mù də wá pwérə wa. Yá u ga wá sin nə kunkun yìèn tə mama. Yu wá fwa ku, u yoo nə yi pùé nədu tíú, u ga yi cígá tíú tə yırı. ¹⁰ Yá nə nə swin də, nə ba cuna tun, ku yi nə biri də, u yi kunkunu, u sugv tə ga tələ nə waa.

2

Zwezi nə wá zıgı nə jırımu Yu yáá con

(Zwan 13.34-35, 14.21-24, 15.12-14)

¹ À bìsíná-ba, à púpúní tə yìèn tə mama á nə, sə á dànà ká fwa cuna. Yá liù nə cùgù, nə jə liù, v wá zıgı nə jırımu, ku yoo tə wa. Ku tíú wulə nyına Yu səpuni nə. Ku liù tə nə yı Zwezi-*Kərisə. Yá v mù dān nə yı cígá tíú. ² U mù tətə nə tıga ndə nə yuu *jonı vanı ba nə gua, sə ku sin nə cuna tə. Ku tà nə mù cıci cuna tə ka lı yırı, ku yı lià tə də mama cuna yırı.

³ Won tə nə bırı nəba, də nə yəə Yu, ku yı, də nə nə zılı v nii yìèn tə. ⁴ Liù nə wú, v yəə Yu, v ga ba v nii yìèn tə zılı, ku tíú yı kunkunu, cígá ga tələ ku tíú con. ⁵ Liù tə, v nə jın v sugu v bican wa, Yu sonu tə cígá súə wá. Ku nətu tə bırı də, nə mù də Yu vwə duən nə. ⁶ Liù tə, v nə swìn də, v wá vwə v tiàn, Yu yıra mánjá mama wuuu, ku tíú mə, sə v ya ndə Zwezi nə yı nətu.

Ka sónı duən yoo

⁷ À nubisoni-ba, ku tə, à nə púpúní á nə, ku tà *nii yoo nədun yoo. Ku nii təntə, à nə púpúní ku yoo á nə, yı nədwan. Ku nii yoo tə yın də aba, ku jıju mama. Ku mù nə yı sugu nədwan tə, á nə nı. ⁸ Nii nədwan tə yoo, à nə púpúní, à pa aba tə, ku nii yoo tə yı nədun də. Ku twá Zwezi də aba, ku ma bırı ku tiàn də, ku yı cígá. Yikunu vıí, nə ga manwarı nə na poni, ku pıplı. ⁹ Də liù nə swìn də, v wulə poni wa, ku tíú ga ba v don tə, v nə yı v nubiu *Kərisə yırı, swə, v mù liù təntə tə wə yikunu wa nan. ¹⁰ Liù tə, v nə swə v don, v nə yı v nubiu Kərisə yırı, ku tíú tə wulə poni wa, mánjá mama wuuu. Yá won ga tələ v waa con, ku nə wá pa v dugu Yu cwəŋə tə. ¹¹ Yá liù tə, v dān nə ba v don, v nə yı v nubiu Kərisə yırı, swə, ku tíú tə wulə yikunu wa, v ga vələ tə wa. U yəri bwálı tə, v nə vələ, yikunu tə nə púə v yía nə yırı.

(Romə tián 12.2, Zwakə 4.4, Matia 6.24)

¹² À bìsíná-ba, à púpúní á nə, sə à swìn á con də, Yu twá Zwezi yiri tə nə, u ma sè u kwen á cuna tə, u li á mù də wá pwéré wa. ¹³ À nyina-ba, à púpúní á nə, á nə yèé liù*f1* tə, u nə yin lá, luu jiju mama wa yiri. À púpúní á nə, balandura-ba, á nə dí diàn *Sitana tə yuu wa yiri. ¹⁴ À bìsíná-ba, à púpúní á nə, á nə yèé á nyina Yu tə yiri. À nyina-ba, à púpúní á nə, á nə yèé liù tə, u nə yin lá luu jiju mama wa yiri. Balandura-ba, à púpúní á nə, á nə dà, yá Yu sugu tə ga wulə á waa, mánjá mama wuuu tə yiri. Ku súrí lá, á dí diàn Sitana tə yuu wa. ¹⁵ Á dànà ká sóní luu yìèn tə, nə à yèé ku wa wiən tə. Liù nə swə wiən tə nə wulə luu ku tə wa, ku tíú ba nyina Yu swə. ¹⁶ Á nənə wiən tə mama, tə nə wulə luu wa: Tə mù nə yi, ləzwənə pùé yokukwınan fira, də u yía ka zu lià wiən, də u wojan fwia. Tə wiən təntə wà nyina Yu con nan, tə yi tə wulə luu ku tə wa. ¹⁷ Á lwara də, luu də ku yokukwınan fira tə wulə tə kèń. Yá liù tə, u dāń nə fwa Yu fira, ku tíú wulə mu wa, ku nə ba zwè u con.

(1 Zwan 4.1-6, 2 Zwan 7-11, Zwan 16.13-15)

¹⁸ À bìsíná-ba, luu zaŋu mánjá bwələ. Á nì də, ba swìn də, Zwezi-*Kərisə duŋu wá bà. Yá síún nə, Zwezi-Kərisə duŋa dáá, ba nə wulə. Ku nətu tə pin, nə lwarı də, ku yi luu zaŋu mánjá nə bwələ. ¹⁹ Zwezi-Kərisə duŋa tə nan nə tətəŋi wa. Yá ba dāń yà tà nə wa lià fuən. Də ba yà nə yi nə wa lià, ba yà bá nan ba yá nəba. Ku nətu tə fwa, sə ku ma biri də, ba mama yà tà nə wa lià. ²⁰ Yá á mù jon Yu-*Siŋu tə. Ku yi Zwezi-Kərisə nə pin ku aba. Mə ku mù nə pin, á mù mama yèé cígá tə. ²¹ Ku tà à púpúní á nə, sə à swìn də, á yəri cígá tə. Ku yi à púpúní, sə à biri də, á yèé ka. Á dāń me, sə á yəni də, kunkun nədu də ba cígá tə con naŋa. ²² Wàà nə yi kunkunu? Ku yi liù tə, u nə swìn də, Zwezi tà Kərisə. U mù nə yi Zwezi-Kərisə duŋu. U mù nə vi nyina Yu də u biú tə mama bələ. ²³ Liù tə, u nə viga biú tə, ku tíú tə viga

nyina tə də. Liù tə, v nə sè biù tə, ku tíú tə sè nyina tə də. ²⁴ Á ziga yoo tə yuu wa, á nə nì ku dèñ laṇv wa. Á nə ziga ku tə yuu wa, á nə nì mánǵá tə wa, ku nə tun, ku buri də, á wá vwə á tiàn nyina Yu də v biù Zwezi yura mánǵá mama wuuu. ²⁵ Yá á nəṇǵə, biù tə kàn nii də, v wá pa nəba mu tə, ku nə ba zwè Yu con.

²⁶ À púpúní tə yìèn tə, à pa aba, lià tə yiri, ba nə wulə ba gígiri aba. ²⁷ Á mù con nə, Kərisə pın aba Yu-Siṇu tə. Ku súə aba, yá á kùb ba liù don kàrà pìà. U Siṇu tə cígá kàrà aba yìèn tə mama, yuu wa. Tə tə yuu wa, ku nə kàri aba, tə yi cígá, tə tà kunḡun. Ku mù nə pın, á twá kàrà tə nii nə, v Siṇu tə nə buri aba. Yá á ga wulə də Zwezi-Kərisə mánǵá mama wuuu.

(Zwan 1.12-13, Romə tiàn 8.14-19, 1 Zwan 5.18)

²⁸ À bìsíná-ba, ku mù tə yiri, á vwə á tiàn Zwezi-Kərisə yura mánǵá mama wuuu. Ku mù nə wá pa diun tə, v nə wá pìi v bà, sə nə zən nə yəni də, fən təlǵ, cavira də dān ká ja nəba v yáá con. ²⁹ Á yèə də, Yu yi cígá tíú. Á dān me, sə á yəni də, liù tə, v nə tuṇa də cígá, yi v biù.

3

Lià tə, ba nə yi Yu bia yoo

¹ Á nəṇǵə tə nə, nyina Yu nə sóní nəba zənzən nətv. U sonu tə pın, v boṇǵə nəba v bia. Yá nə cígá ga yi Yu bia də. Lià tə, luu nə ti ba, wà Yu yəni. Ku mù nə pın, ba yəri nə də. ² À nubisoni-ba, síún nə, nə dān yi Yu bia. Yá won tə, nə nə wá yà, Yu tə wà ku buri. Nə dān nə yèə də, Zwezi-*Kərisə nə wá pìi v bà, mánǵá tə wa, nə wá na nətv tə, v nə yi. Yá nə wá lwàń, nə jì ndə v nə. ³ Liù tə mama, v nə jə yala təntə Zwezi-Kərisə con, ku tíú yàá kə diàn, sə v kwen v bican, sə ku ya nəpon Yu yáá con. Yá v dān wá yà ndə Zwezi-Kərisə tətə nə, v bican nə yi nəpon Yu yáá con.

Cvna liù ba Yu nii yìèn zìlǵ

⁴ Lìù tə mama, v nə tɔŋa cuna, ku tíú vɪga Yu *nii. Ku dān pìà ku bɪrɪ də, cuna yɪ ka vɪ Yu nii zìlǎ. ⁵ Á yèǎ də, Zwezi-*Kərisə twi tia yuu wa, sə v lɪ lǎ cuna. Yá v tətə yuu ba cuna jə. ⁶ Lìù tə mama, v də wá dān nə vwə duən nə, mánǎ mama wuuu, kùb ba cuna fwa. Yá lìù tə v nə tɔŋa cuna, ku tíú tə wà wá nɪ, v ga yəri wá də.

⁷ À bìsíná-ba, á dānà ká pa lìù mama gɪgɪrɪ aba. Lìù tə, v nə tɔŋa də cígá, ku tíú yɪ cígá tíú, ndə Zwezi-Kərisə tətə nə yɪ cígá tíú nətɔ. ⁸ *Sítana nə tɔŋa cuna, ku jɪv mama. Ku mù nə pɪn, lìù tə, v nə tɔŋa cuna v yɪ Sítana nə tɪ. Yu-Biu Zwezi-Kərisə twi tia yuu wa, sə v cùgù Sítana tùtùnnán tə mama.

⁹ Lìù tə mama, v dān nə ya Yu bìú, v jə Yu mu tə. U ga ba cuna tɔŋa. Yu dān nə yɪ v nyina. Ku mù nə pɪn, v wàrɪ cuna v tɔŋa. ¹⁰ Mə ku twá nətɔ, ba ma lwarɪ Yu bia tə də Sítana bia tə swíán duən wa. Lìù tə mama, v nə ba tɔŋa də cígá, ku tíú tà Yu bìú. Lìù tə də, v nə ba v don, v nə yɪ v nubiú Kərisə yɪrɪ, swə, v də tà Yu bìú.

Nii sonu də bɪcan sonu yoo

(Zwan 15.12-21, 1 Zwan 4.7-8, 16-21)

¹¹ Ku tə, ba nə swìn, ba pa á nì, ku jɪv mama, ku mù nə yɪ, sə nə sóní duən. ¹² Nə wà mɛ, sə nə ya ndə Kayen nə. U mù yà yɪ *Sítana nə tɪ. Kayen gua v nyánú. Yá bèè nə pɪn, v ma gu v nyánú tə? Ku yɪ v mù Kayen tùtùnnán yà yɪ tutunkunkwɪnan, yá v nyánú tə tùtùnnán ga zìən. Ku mù nə pɪn, v ma gu wá. ¹³ À nubia-ba, á dānà ká pa ku dì á yuu də lǎ tə, luv nə tɪ ba nə dɔŋa aba. ¹⁴ Nə swə nə duən tə, ba nə yɪ nə nubia *Kərisə yɪrɪ. Ku mù nə pɪn, nə yèǎ də, nə nan tian wa, nə zu mu wa, ku nə ba zwè Yu con. Lìù tə, v nə ba v don, v nə yɪ v nubiú Kərisə yɪrɪ, swə, ku tíú tə wulə tian wa, tə nə ba zwè. ¹⁵ Lìù tə mama, v nə dɔŋa v don, v nə yɪ v nubiú Kərisə yɪrɪ, ku tíú yɪ lagurɔ. Yá á ga yèǎ də, lagurɔ nədɔ tətə ba mu tə, ku nə ba zwè Yu

con, tə jə, ʋ pa ʋ tiàn nə. ¹⁶ Zwezi-Kərisə nə ti ʋ mu, ʋ ma lárí nə yuu nə. Yá ku dàń twá də ʋ mù, nə lwarí won tə, ku nə yí sonu tə. Nə də dàń mə, sə nə ti nə mu tə, nə ma lárí nə duən tə, ba nə yí nə nubia Kərisə yiri, yuu nə. ¹⁷ Ku wàá ku pín jìjə tíú don ní ʋ don, ʋ nə yí ʋ nubiu Kərisə yiri, yojanv wa, ʋ ga vi, sə ʋ san wá. Nətə nə ba wàá ba swìn də, Yu sonu tə wulə jìjə tíú təntə bican wa?

¹⁸ À bìsíná-ba, nə sonu tə mə, sə ku ya cígá cígá sonu, ba nə na ku, nə tütùnnán wa. Nə dànà ká ja nii sonu tə, ku nə swìn sùràn tə nə ywán cici.

¹⁹ Mə nətv, nə nə wá twá nə ma lwarí də, nə yí cígá tiàn. Yá mə nətv, nə nə wá twá, nə ma ja bican sié Yu yáá con. ²⁰ Nə yèé də, Yu dwə nə pubuŋa tə, ʋ ga yèé won mama. Ku mù nə yí, də nə nə caga nə tiàn nii nə nə bican wa, ku ba dèń jə.

²¹ À nubisoni-ba, də nə dàń nə ba nə tiàn nii nə caga nə bican wa, nə wá zən nə yəni də, fən tɛ́lɛ́ Yu yáá con. ²² Nə zílí Yu nii yìèn tə, yá nə ga tuŋa ku tə, ʋ nə swə. Ku mù nə pín, won tə mama nə nə lòrì ʋ con, ʋ wá pa ku nəba. ²³ Á nəŋə, ku tə nə yí ʋ nii yoo tə. Ku mù nə yí, sə nə kə nə waa ʋ bìú Zwezi-Kərisə nə. Yá nə ga sóní duən, ndə Kərisə nə pín nəba nii ku yoo təntə yuu wa nətv. ²⁴ Lìù tə, ʋ nə zílí Yu nii yìèn tə, ku tíú vwə ʋ tiàn Yu yira, mánjá mama wuuu, Yu də ga wulə də wá mánjá mama wuuu. Yá ku twá də Yu-*Sìŋu tə, ʋ nə pín nəba, nə yèé də, Yu wulə də nəba, mánjá mama wuuu.

4

Yu-Sìŋu tə də kunkuna yoo

(1 Zwan 2.18-27, 2 Zwan 7-11)

¹ À nubisoni-ba, á dànà ká kə á waa lià tə mama nə, ba nə swìn də, ba súé də Yu-*Sìŋu tə. Sín nə, kunkun sùsùnà súé luv wa. Á mə, sə á dí yáá, á

mìlàn ba á lwarì dè, Sínu tɛ, ba nə jə, nə ya Yu-Sínu tɛ. ² Á nəŋə nətu tɛ, á nə wá twá, á ma lwarì dè, ku nə ya Yu-Sínu tɛ. Lìù tɛ mama, v nə swìn v bɪrì dè, Zwezi-**Kərisə* cígá nan Yu con, v bà, v pa, kan lɪrì wá tia yuu wa, ku tíú yɪ Yu nə tɪ wá. ³ Lìù tɛ mama, v nə ba cígá tɛ bɪrì Zwezi-*Kərisə* yoo tɛntə yuu wa, ku tíú tà Yu nə tɪ wá. Ku tíú súé dè *Kərisə* duŋv tɛ sínu tɛ. Á dí yáá á nì dè, *Kərisə* duŋv tɛntə wá bà. Sín nɛ, v manwarì v wulə luv wa. ⁴ À bèsíná-ba, á mù yɪ Yu nə tɪ aba. Yu-Sínu tɛ, ku nə súé aba, ku diàn dwə sínu tɛ, ku nə wulə là tɛ con, luv nə tɪ ba. Ku mù nə pɪn, á dí diàn kunkun sùsùnà tɛ yuu wa. ⁵ Ba mù yɪ luv nə tɪ ba. Ku mù nə pɪn, ba swìn tɛ tɛ, là tɛ luv nə tɪ ba, nə swìn. Ku mù yɪrì nə là tɛntə cuga ba sùràn tɛ. ⁶ Nə mù ya Yu nə tɪ nəba. Lìù tɛ, v nə yèé Yu, v yáá cugv nə sugv. Yá liù tɛ, v nə tà Yu nə tɪ wá, v ba nə sugv cuga. Mə ku twá nətu, nə ma lwarì sínu tɛ, ku nə yɪ cígá, dè kunkun sínu tɛ swíán duən wa.

Sóní Yu, sə n sóní n duən

(1 Zwan 3.11-24, Zwan 3.16-17, Romə tìlàn 5.5-8)

⁷ À nubisoni-ba, sonu yɪ ku nan Yu con. Ku mù nə pɪn, nə swéné duən. Lìù tɛ mama, v nə jə sonu, v ya Yu bìú, yá v ga yèé Yu dè. ⁸ Yu ya sonu Yu. Lìù tɛ, v nə ba sonu jə, v wà Yu lwarì. ⁹ Á nəŋə nətu tɛ, Yu nə twá, v ma bɪrì v sonu tɛ nəba. Ù tun v bidva kələn tɛ tia yuu wa, sə nə twá dè wá, nə na mu tɛ, ku nə ba zwè v con. ¹⁰ Á nəŋə nətu tɛ, v sonu tɛ nə yɪ. Ku tà, nə nə sóní Yu tɛ yɪrì, ku ya, v nə swə nəba tɛ yɪrì. Yá v dàñ tun v bìú tɛ, sə v tɪ, ndə nə yuu **jɔŋi* vanì nə, ba nə gva, sə ku lɪ nə cuna tɛ.

¹¹ À nubisoni-ba, dè Yu nə sóní nəba sonu tɛntə yɪrì, nə dè dàñ mɛ, sə nə sóní duən. ¹² Lìù mama tɛ wà Yu nɪ. Dè nə nə swə duən, Yu wulə dè nəba, mánjá mama wuuu, yá v sonu tɛ súé nəba cígá cígá.

¹³ Yu pɪn nəba v Sínu tɛ. Ku mù nə pɪn, nə yèé dè, nə vwə nə tiàn Yu yura, mánjá mama wuuu. Yu dè ga vwə nəba, mánjá mama wuuu. ¹⁴ Yá nə

mù dàń nı, nə ga swìn nə bırı də, nyına Yu tun v bìú Zwezi tə tia yuu wa, sə v jon ləzoni ba cuna wa. ¹⁵ Lìù tə, v nə swìn, v bırı də, Zwezi ya Yu-Biu, Yu wulə də ku tíú, mánjá mama wuuu, v də ga wulə də Yu, mánjá mama wuuu. ¹⁶ Nə mù yèé sonu tə, Yu nə swə nəba. Yá nə pın cígá ku yoo tə nə də. Yu ya sonu Yu. Lìù tə, v nə jə sonu, v wulə də Yu mánjá mama wuuu. Yu də ga wulə də wá, mánjá mama wuuu. ¹⁷ Də nə nə súé də sonu cígá cígá, ndə ku nə me nətɔ, ku mù nə wá pa, nə zən nə yəni də, fən tələ dun tə nə, Zwezi nə wá pìí v bà, sə v bürì bura tə. Nətɔ tə, Zwezi dàń nə yı, mə nətɔ nə də yı luv wa. ¹⁸ Sonu wa ba fən jə. Ku mù nə pın, lìù tə, fən nə jə, v wà swí də sonu. Lìù nə yèé də, càn biàn v yuu wa, ku mù nə yàá pa fən jə wá. Ku mù nə pın, lìù tə fən nə jə, v ba cígá cígá sonu jə.

¹⁹ Yu nə dí yáá v sóní nəba. Ku mù nə pın, nə mù jə sonu tə. ²⁰ Də lìù nə swìn də, v swə Yu, v ga dɔŋa v don, v nə yı v nubiu Kərisə yırı, ku tíú yı kunkunɔ. Də v nə ba v nubiu tə swə, v ga na wá v yía wa, v wàrì Yu tə, v nə ba na v yía wa, v sóní. ²¹ Á nəŋə yoo tə, Yu nə pın nəba v nii tə ku yuu wa. Lìù tə, v nə swə Yu, v me, sə v sóní v nubiu də.

5

Kərisə làà dí diàn luv wiən yuu wa

(2 Zwan 5-6, Zwan 1.29-34, 3.36, 20.31)

¹ Lìù tə mama, v nə pın cígá də, Zwezi nə yı *Kərisə, ku tíú ya Yu bìú. Yá lìù tə mama, v nə swə v nyına Yu, v swə v bia tə də. ² Á nəŋə nətɔ, nə nə wá twá nə lwarì də, nə swə Yu bia tə. Ku mù nə yı, nə nə swə Yu, yá nə ga zìlí v nii yìèn tə.

³ Á nəŋə, ku tə nə bırı də, nə swə Yu. Ku mù nə yı, nə nə zìlí Yu nii yìèn tə. Yá Yu nii yìèn tə ka zìlí ga ba cà.

⁴ Lìù tə mama, v nə ya Yu bìú dí diàn, luv yìèn yuu wa. Á nəŋə nətɔ tə,

nə nə dí diàn luu yìèn yuu wa. Ku mò nə yɪ nə waa tə, nə nə ken Yu nə.

⁵ Liù tɛ̀lɛ́, v nə dí diàn luu yìèn yuu wa, də ku nə tà liù tə, v nə pɪn cígá də, Zwezi ya Yu-Biu.

Yìèn tə, tə nə biri də, Zwezi yɪ Yu-Biu

⁶ Zwezi nə ya liù tə, v nə twi də níá*f1* də jana. Ku tà níá cíɪ nə, v ja bà. Ku yɪ níá də jana nə, v ja bà. Yu-*Sɪŋu tə nə pɪn, ba lwarɪ də, ku yoo tɛ̀ntə yɪ cígá, Yu-Sɪŋu tə swìn cígá. ⁷ Wiən batwa nə biri ku yoo tɛ̀ntə. ⁸ Ku mò nə yɪ Yu-Sɪŋu tə, də níá tə, də jana tə. Yá tə wiən batwa tə mɛ yɪ yoo nədu tɛ̀ntə nə tə biri.

⁹ Liù nə swìn yoo v biri nəba, nə yàá jon ku. Yá Yu nə swìn yoo v biri, ku mò nə dwə. Á nɛŋə ku tə, Yu nə swìn v biri v biú tə yoo yuu wa. ¹⁰ Liù tə, v nə ken v waa Yu-Biu tə nə wuuu, v jə Yu sùràn tɛ̀ntə v waa con. Liù tə, v nə wà v waa ken Yu-Biu tə nə, v ja Yu v ma jì kunkunu, v nə wà cígá pɪn Yu sùràn tə nə, v nə swìn v biú tə yoo yuu wa yɪɪ. ¹¹ Á nɛŋə, tə sùràn tɛ̀ntə nə: Yu pɪn nəba mu tə, ku nə ba zwè v con. Yá v biú tə dàń nə yɪ mu tɛ̀ntə dəkuu. ¹² Liù tə, Yu-Biu tə nə wulə də wá, ku tíú tə jə mu tɛ̀ntə. Liù tə, Yu-Biu tə nə tɛ̀lɛ́ də wá, ku tíú ba mu tɛ̀ntə jə.

¹³ À púpúní sagɪ ku tə, à pɪn aba, sə á lwarɪ yoo ku tə. Ku mò nə yɪ, á nə kəni á waa Yu-Biu tə nə wuuu, á jə mu tə, ku nə ba zwè Yu con.

(Zwan 15.7, Marəkə 11.24, 1 Zwan 3.6-9)

¹⁴ Yá á nɛŋə nətu tə, nə nə zən nə yəni də, fən tɛ̀lɛ́ Yu yáá con. Də nə nə lɔ̀rì won, ku twá də v fira tə, v cuga nəba. ¹⁵ Də nə dàń nə yèé də, v cuga nəba won tə mama, nə nə lɔ̀rì v con, nə yèé də, v wá pa ku nəba də.

¹⁶ Də liù nə nɪ v don, v nə yɪ v nubiu *Kərisə yɪɪ, də v tuŋa cuna, tə nə bá ja wá tə va tian wa, sə v jun Yu. Yá Yu wá pa mu v don tɛ̀ntə nə, v nə yɪ v nubiu Kərisə yɪɪ. Ku nətu tə jə nywarɪ, ku pa là tə nə, ba cuna tə nə bá kə ba tian wa. Yá cuna duən dàń nə wulə tə yígúré nə yɪ tian. Ku tà cuna yiri

təntə yiri nə, à swìn á con, sə á jun Yu. ¹⁷ Tutunyiri mama ku nə yi kunkun yoo, ku ya cuna. Yá cuna duən wulə, tə nə ba liù tian wa keni.

¹⁸ Nə yèé də, liù tə mama, v nə ya Yu bìú, Yu-Biu Zwezi nə cì v nə, v kúù ba cuna tuŋa. Ku mù nə pın, *Sítana wàrì won mama, v fwa v yıra. ¹⁹ Nə yèé də, nə ya Yu nə ti. Yá Sítana nə dí diàn lià tə mama yuu wa, ba nə yi luu nə ti ba.

²⁰ Nə yèé də, Yu-Biu Zwezi twi, v ga pa nəba wubuŋa, sə nə lwarı Yu tə, v nə yi cígá cígá Yu. Ku twá də v bìú Zwezi-Kərisə, nə dān wulə, də v mù cígá cígá Yu. U mù nə yi cígá cígá Yu, v nə pın mu tə, ku nə ba zwè.

²¹ À bìsíná-ba, á cia á tiàn nə də woŋwanan tə.